

Kelebihan Beramanah

Daripada Abu Said al-Khudri RA, Rasulullah SAW bersabda:

التَّاجِرُ الْأَمِينُ الصَّدُوقُ مَعَ النَّبِيِّنَ وَالصِّدِّيقِينَ وَالشُّهَدَاءِ وَالصَّالِحِينَ

Maksudnya: "Peniaga yang beramanah, jujur lagi benar bersama para Nabi, siddiqin (orang-orang yang benar), mereka yang mati syahid dan orang-orang yang soleh."

Riwayat al-Tirmizi dalam *al-Sunan* (3/515), al-Hakim dalam *al-Mustadrak* (2/6) daripada Abu Said RA. Diriwayatkan juga oleh Ibn Majah dalam *al-Sunan* (2/724) dan al-Hakim dalam *al-Mustadrak* (2/6) daripada Ibn Umar R.Anhuma.
Hadis ini daif.

Pedoman dan Iktibar Hadis

Antaranya:

1. Hadis ini menggambarkan betapa mulianya kedudukan peniaga yang amanah lagi jujur dan benar dalam urusannya sehingga ditempatkan bersama golongan pilihan Tuhan dari kalangan para nabi, siddiqin, syuhada dan orang soleh.
2. Amanah itu hendaklah dipikul oleh orang yang *iltizam* hubungannya dengan Allah melalui sembahyang yang didirikan. Konsep amanah menjadi tonggak penting dalam segala aspek.
3. Mengikut perspektif Islam, semua urusan di dunia bukan hanya dikawal oleh undang-undang dan peraturan yang zahir sahaja tetapi dalam masa yang sama ianya dikawal oleh hati yang berperasaan amanah dan tanggungjawab kepada Allah.

4. Balasan di akhirat adalah sebaik-baik balasan jika di dunia dilakukan segala perintah Allah dan beriman dengan-Nya.
5. Wajib kita beriman dengan balasan baik dan buruk yang telah ditetapkan Allah berdasarkan keimanan dan juga amalan soleh yang dilakukan dalam kehidupan seharian.
6. Sewajarnya apabila kita diberi satu-satu tanggungjawab dan tugas sama ada sekecil-kecilnya atau sebesar-besarnya hendaklah menunaikan sifat amanah dengan sejujur-jujurnya.
7. Dalam hadis ini juga ditekankan konsep amanah kepada peniaga di mana melahirkan peniaga yang bersifat amanah amat dituntut dalam membina sesebuah negara kerana sudah pasti keharmonian akan dikecapi oleh masyarakat dan rakyat dengan sifat peniaga yang beramanah.

Mutiara Hikmah

- ❖ **Pujangga berkata:** Menjadikan Nabi Muhammad SAW sebagai teladan, kerana baginda adalah pemimpin yang membawa kebahagiaan, yang menunjukkan kepada kejayaan dan yang membawa kepada keberuntungan dan kejayaan.
- ❖ **Pujangga berkata:** Percayalah pada diri sendiri dan janganlah bergantung kepada orang lain. Anggaphlah bahawa mereka menjadi tanggungan anda dan bukan anda yang menjadi tanggungan mereka dan bahawa Allah SWT yang bersama diri anda. Jangan tertipu dengan orang yang selalu berfoya-foya.

Kisah Teladan

Diriwayatkan bahawa seorang lelaki yang telah menuju ke Baitullah al-Haram (Kaabah) untuk menunaikan haji. Setelah tiba di Kota Mekah, lalu dia menyimpan wang sebanyak 1000 dinar pada seorang yang jujur dan berakhlak mulia. Kemudian orang kaya itu menuju ke Arafah untuk berwukuf di sana.

Setelah selesai dari wukuf dan amalan hajinya yang lain, dia kembali ke Mekah dan mendatangi rumah orang yang dititipkan wangnya dahulu itu, maka didapatinya orang itu sudah mati. Orang kaya tersebut lalu bertanya hal itu kepada keluarganya tentang wang yang disimpan pada orang itu dan keluarganya menjawab: Kami tidak tahu apa pun tentang simpanan itu.

Akhirnya orang kaya itu bertanya kepada seorang ulama di Mekah dengan memberitahu tentang keadaannya dan wangnya yang disimpan kepada orang yang jujur itu. Ulama itu menjawab: Nanti di tengah malam, pergilah engkau ke perigi Zamzam, dan lihat ke dalamnya. Kemudian panggillah nama si fulan itu. Jika dia termasuk dalam penghuni syurga, maka dia akan menjawab panggilanmu.

Maka orang kaya itu pergilah menuju ke perigi Zamzam pada waktu malam, lalu memanggil nama orang itu, sekali dan dua kali, dan seterusnya, namun tidak ada yang menjawab panggilan itu. Pada keesokannya, orang kaya itu menemui sekali lagi ulama Mekah itu, serta menceritakan apa yang telah berlaku pada malam tadi.

Mendengar khabar itu, ulama itu terus mengucapkan kalimah *istirja* ' iaitu *إنا لله وإنا إليه راجعون*. Aku khawatir bahawa temanmu itu, jangan-jangan dia tidak termasuk penghuni syurga. Sekarang cuba kamu pergi ke Yaman, di sana ada satu perigi Barhut namanya, yang pernah dikatakan orang bahawa perigi itu adalah mulut neraka Jahannam. Lalu datanglah dia di malam hari, serta panggillah nama si fulan itu. Jika dia termasuk penghuni neraka, maka dia akan menjawab panggilanmu itu, dan tanyakanlah kepadanya tentang wangmu itu, di mana?

Maka pergilah orang kaya itu menuju ke Yaman, lalu bertanya kepada orang tentang tempat beradanya perigi Barhut itu. Akhirnya dia ditunjukkan orang tempatnya. Pada malamnya, dia datang ke perigi Barhut itu, lalu memanggil nama orang yang pernah menerima barang simpanannya itu. Maka dengan serta merta orang itu menjawab. Orang kaya itu bertanya: Di manakah engkau simpankan wang emas (dinar) aku itu? Orang itu menjawab: Aku telah menyimpannya di suatu tempat di rumahku. Dan aku tidak percaya kepada sesiapaupun, sekalipun anakku sendiri. Sekarang pergilah engkau ke tempat ini dan itu, dan galilah di situ, nescaya engkau akan menemui wang dinarmu itu.

Kemudian orang kaya itu bertanya: Apakah yang menyebabkan engkau berada di sini, sedangkan engkau orang baik, dan kami semua bersangka baik terhadapmu? Maka orang itu menjawab: Aku mempunyai seorang saudara perempuan yang miskin, dan aku tidak mempedulikannya dan bertanyakan hal keadaannya serta

tidak merasa kasihan kepadanya, maka kerana itulah Allah telah menyeksaku di sini dan menempatkanku di neraka jahannam.

Untuk membenarkan cerita ini, disebutkan di dalam sebuah hadis. Nabi SAW bersabda:

لَا يَدْخُلُ الْجَنَّةَ قَاطِعٌ رَحِيمٍ

Maksudnya: "Tidak akan masuk syurga orang yang memutuskan hubungan silaturahim."

Riwayat al-Bukhari dan Muslim